

Хайр, рамазон!

05:00 / 14.01.2017 3643

Ўн бир ой кутганди ташрифингни жон,
Ўн бир ой безанмиш сен учун Жинон,
Соғинчинг қонмасдан, тушди-ку ҳижрон!
Ал-фироқ, кечалар! Ал-фироқ, айём!
Алвидо, Рамазон! Алвидо, Сиём!

Вужудинг дилларга имтиҳон эрмиш,
Висолу фироқинг иймон синармиш,
Қадрингни билганлар қадринг топармиш,
Сени севганларга дўзахдир ҳаром!
Алвидо, Рамазон! Алвидо, Сиём!

Сенда инмиш кўкдан Тавроту Инжил,
Иброҳим суҳуфи, Забури жамил,
Сенда нозил бўлмиш Қуръони Жалил,
Сен Калом ойисан, суннатинг қиём,
Алвидо, Рамазон! Алвидо, Сиём!

Сен мурувват оий, саховат оий,
Илму амал, тақво, тиловат оий,
Намозу дуо-ю ибодат оий,
Қанийди этсайдинг йил бўйи давом!
Алвидо, Рамазон! Алвидо, Сиём!

Шайтонлар кишанда, руҳлардир озод,
Нафс иши касоду, қалб уйи обод,
Малаклар ҳавасда, ёмонлар барбод,
Инсон ўзлигини топмишдир тамом,
Алвидо, Рамазон! Алвидо, Сиём!

«Аллоҳу акбар!», бас, оғиз ёпилар,
«Аллоҳу акбар!», бас, рўза очилар,
Демакки, ҳар ишда «Аллоҳу акбар!»,
Аллоҳ улуғ, бас, сен улуғсан мудом,

Алвидо, Рамазон! Алвидо, Сиём!

Бир кечанг бор сенинг, минг ойдан афзал,
Бир тунлик ибодат – минг ойлик амал,
Умр қисқалиги етказмас халал,
Бу кеча тонггача саломдир, салом!
Алвидо, Рамазон! Алвидо, Сиём!

Ёғар ташрифингдан ҳар ён баракот,
Амал дафтарига тўлар ҳасанот,
Кетарсан, дилларга чўкар ҳасарот,
Келдинг-у, кетмоққа ростладинг хиром!
Алвидо, Рамазон! Алвидо, Сиём!

Ким сенда эзгудир, йил бўйи эзгу,
Сендан бебахрага йўқ абад ёғду,
Мағфират топмаган кечгуси қайғу,
«Хор бўлсин!» демишлар Соҳиби икром,
Алвидо, Рамазон! Алвидо, Сиём!

Биз сендан тонмадик, тонма биздан ҳам,
Райён эшигида кут бизни бир дам,
Шафоатчимиз бўл, рад этмас Эгам,
Саломун алайкум, ва алайкум салом!
Алвидо, Рамазон! Алвидо, Сиём!

Биз армон ютармиз. Майли, яхши бор,
Кутармиз ўн бир ой яна интизор,
Яна дийдорингга етказсин Ғаффор!
Борган-келганингга минг бор эҳтиром!
Алвидо, Рамазон! Алвидо, Сиём!

Ҳусайнхон Яҳё Абдулмажид
1434. 23-Рамазон/01.08.2013.